

**Date – 17/10/2024**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

1. Central YMA chuan dan hnuai Learner leh Driving Liscence nei theilo pe chhuak thintu mi thenkhatte leh DTO a thawktute an chhui chhuak vek tawh an ti.
2. Champhai North bialtu MLA Pu H. Ginzalala chuan nimin khan Champhai Keilungliah Dam-ah Pedal Boat Service a hawng.
3. Union Cabinet thukhawm chuan kum 2025-26 marketing season chhungin Rabi Crop ah Minimum Support Price (MSP) tihsan a remti.
4. President Draupadi Murmu-i chuan nimin khan Mauritania a thleng.

<><><>

**CYMA**

Central YMA chuan dan hnuai Learner leh Driving Liscence nei theilo pe chhuak thintu mi thenkhatte leh District Transport Officer (DTO) a thawktute an chhui chhuak vek tawh an ti.

Central YMA hruaitute hian an President Pu Lalhmachhuana hovin nimin khan Transport Minister Pu Vanlalhlana an kawm a, tun hnai hun engemaw chen kalta atang khan, mi thenkhatte leh raltnan thenkhat ten Driving License awlsam taka an nei mai thei thin chu chhui chiangin, mi engemaw zat an kawm chiang a. Heta an thil hmuh chhuah chu, Mizoram mi leh sa dik tak zinga mi thenkhatte leh DTO a thawktute inthuralin, danin a phut anga Learner & Driving Liscence nei thei tura lehkha pawimawh thil tel ngai nei lo te hnenah Learner & Driving Liscence pekchhuah a ni ngei tih an finfiah thu an sawi a ni.

CYMA hruaitute chuan Learner & Driving Liscence siam duh te chuan hetiang siam theia in sawi Commission ho hnenah document engmah pek ngai lovin an an inchhiar zat sum tam tham deuh zawk an pe a, an ni hian Aizawl DTO-a thawktute hnenah pawisa chawi ngai aia tam pe ve leh in, an lo siam sak thin a ni an ti a, hetiang pawn lam mi Learners leh Driving Liscence siam sak thei tuten Department lama thawktute pawisa an pe tih finfiahna pawh Central YMA hruaitute hian Minister hi an hlan vek a ni.

Hetianga thil diklo ti thin DTO pisa chhunga thawktu te leh pawnlam atanga commission lo ti thin office lam thurualpui tu te hi Central YMA chuan an hrechhuak vek tawh tih Minister hi an hrilh a. Mizoram khawpui ber, Aizawla DTO in hetiang an tih theih chuan District dangah pawh hlauhthawn an neih len viau thu Central YMA hruaitute hian an sawi bawk a ni.

Central YMA in hemi chungchanga hmalak sak tura Minister an ngenna lehkhah hian, a enkawl Transport Dept. hnuai dik lo taka Learner & Driving Licence pekchhuaha inhnawnawihthe chu dan anga na taka hrem tur leh dan in a phut documents engmah nei lo leh Driving Test pawh paltlang miah lova,

Driving Licence pek chhuah mi engemawzat chu cancel leh sak tur leh, tun hnuah hetiang a thlen tawh loh nana rang taka hmalaksak turin an ngen a ni.

CYMA hruaitute hian ruihhlo phur thin Maxi Cab leh Public Carrier te ruihhlo an phurh nen a man te chu an public carrier license cancel thin tur te leh hnamdang motor, state dang registration nei passenger phur tur nilovin Mizoram hmun hrang hrang passenger phura an tlan thin chungchang te leh Lirthei neituten Garage nei vek tur anih chungchangah khauh zawk a kalpui tura ngenna an thlen tel bawk a ni.



#### **LESDE**

Labour Employment Skill Development and Entrepreneurship (LESDE) Department leh National Skill Development Corporation International te tangkawpin, Japan rama caregiver hna thawk duhte tana inhrilhriatna hun “ Awareness Seminar on Caregiver Program in Japan” chu nimin khan Aizawlah buatsaih a ni a.

Sompo Care Inc Japan atangin Jin Enamoto, Manager, New Business Development in Asia Pacific leh Kazunari Honda, Sr. Leader, Global Strategy ten he hun hi an hmanpui a, an company chungchang leh India rama thalai tam tak ten Japan rama eizawna an neih theihna atana caregiver hnaruak an neih dan te leh an thawh theih dan tur te, an nitin hnathawh dan tur leh an hamthatna hrang hrang awm thei te an sawi a.

Interview leh admission tih dan te tarlangin, Japanese tawng zir chung leh senso ngai te, exam awm thei chi hrang hrangte leh hriattur pawimawh Skill loan awm thei chungchang te tarlangin, kal khawm ten zawhna an neih apiang chhanna hun buatsaih a ni bawk.

He hun hi LESDE Director Pi Angela Zothanpuiin a hmanpui a. Department in a hma a lo lak tawh thin na te tarlangin, LESDE department hmalakna in Nurse 16 Japan ram a an thawk mek a. Tunah hian Japanese Language training mek 40 chuang an awm thu a tarlang bawk.

NSDCI training centre te amah ngeiin a tlawh tawh thu leh hmalakna te sawi lang in, thalai ten a hma an sawn theihna tur te, Japan ram atanga entawn tur tha te entawn a hmasawn zel theihna tur kawng hrang hrang te sawiin kalkhawm te sawmna leh fuihna thu a sawi a; NSDCI te hmalakna hi Ministry of Skill Development and Entrepreneurship te hmalakna a nih thu a tarlang bawk a ni.

He programme-ah hian B.Sc Nursing, GNM, ANM, GDA leh Geriatric caregiver course zirzo tawh leh zir mek te lo kal khawmin thalai mi 50 velin he hun hi an chhim thei a ni.

#### **(DIPR)**



#### **KHAWZAWL**

Khawzawl district chhunga buhbal, thlai leh sa hmanga eizawna mumal tak siam chungchangah DC Meeting Hall-ah meeting neih a ni a, Addl. Deputy Commissioner, Pu Lalfakzuala'n meeting hi chairman niin a kaihruai a ni.

He meeting-ah hian buh, alu leh hmarcha chin chungchang bakah arsa, sangha, kel sa leh artui hmanga intodelhna siam chungchang rel a ni a, hetiang eizawna hmang mi tam zawkin an hlawk pui theih dan sawi ho a ni. Thlai chinna lama harsatna chi hrang hrang, tui harsatna te, kawng tha taw lo te, hralhna tur hmuh hnem taw loh te leh thil danga tanpuina pek dan tur te sawi ho a ni a, ransa vulhte tan hlawk zawk leh zau zawka sa leh artui hralh theih dan tur te sawi ho a ni bawk. Chairman Pu Lalfakzuala chuan meeting hlawk thlak tak a nih ngei a rin thu a sawi a, kalkhawmte chungah lawmthu sawiin tul ang zela taima taka hma la zel turin a fuih a ni.

He meeting-ah hian SDO (Sadar), Pu Suvigya S. Chandra; BDO, Pu Timothy R. Lalmangaiha; SDC, Pu Elijah L.H. Sanga leh department hrang hrang hotute an tel a ni.

#### **(DESK)**



## CHAMPHAI PEDAL BOAT SERVICE

Adviser to CM, Champhai North bialtu MLA Pu H. Ginzalala chuan nimin khan Keilungliah Dam, Champhaiah Pedal Boat Service a hawng.

Pu Ginzalalachuan Keilungliah Dam hi sawrkar hmasa pahnih te bulṭan leh hmawr bawk a nih thu sawiin, sawrkar kal ta te thawhrimnaah lawmthu a sawi a. Pedal Boat Service bulṭan nan lawng 4 dah phawt a nih thu sawiin, chetsualna a thlen palh chuan an hmahlirte a tihchhiat vek theih avangin fimkhur taka enkawl a tul thu a sawi a. Keilungliah Dam chu Champhai ti Champhai tu a la nih chhoh zel dawn avangin ngaihtuahna thar nen tihmasawn zel tum a ni tiin khualzinte hipna pawimawh tak a nih theihna tura buatsaih zel tum a nih thu a sawi. Champhai District-a khualzinte tlawh tur hmunhma te chu Swadesh Darshan kaltlanga changtlung taka siam chhoh tum a nih thu pawh Er H. Ginzalala hian a sawi a, Keilungliah Dam-ah hian Speed Boat pawh dah leh tum a nih thu a sawi bawk.

Pu Ginzalala chuan Keilungliah Dam tlawhtute tan Restaurant te, riahna tur te, leh venhimna lam te a hmunah dah ala nih tur thu sawiin hmalakna tur hmachhawp an la neih hrang hrangte he hunah hian a tarlang a ni.

(DIPR)



**AR**

Assam Rifles chuan Staff Selection Commission SSC Recruitment Rally atan Registration leh training drive an nei a, tun thla ni 1 atanga ni 15 chhung khan Aizawl, Serchhip, Lunglei, Siaha leh Lawngtlai district-a registration ah mi 198 an inziaklut.

Assam Rifles-a post hrang hrang hnawhkhah tura candidate duh te tan he hun hi buatsaih a ni a, an hna dil tur a zirin, kawng an kawhhmuh nghal dawn a ni.

(PR)



**UNION CABINET HIKEDMSP**

Union Cabinet thukhawm chuan kum 2025-26 marketing season chhungin Rabi Crop ah Minimum Support Price (MSP) tihpun a remti. Union I&B Minister Ashwini Vaishnaw chuan nimin tlai khan chanchinbumite a kawmnaah he thu hi Prime Minister Narednra Modia kaihhruaia Union Cabinet thukhawm chuan loneituten manman zawka an thlai tharte an hralh theih nan MSP hi tihsan a ni a ti.

Varanasi-Pandit Deen Dayal Upadhyaya multi-tracking project hnuaiah Ganga lui chunga lei siamna tur a pawm bawk a. He project atan hian cheng vaibelchhe sang 2 leh 642 ruahman a ni a ti.

Union Cabinet hian Central hnuaia sawkar hnathawk leh pensioner-te DA chu zaa pathumin a tipung bawk a. DA pung hi central sawrkar hnathawk mi nuai 49 leh pensioner mi nuai 64 chuangin an chhawr dawn a ni a ti.

(Newsonair)



**PRESIDENT MURMU**

President Draupadi Murmu-i chuan nimin khan Mauritania a thleng a. Mauritania President Mohamed Ould Ghazouani chuan Nouakchott-Oumtounsy International Airport-ah President Murmu-i hi a lo hmuak a. Mauritania-a a cham chhungin sawrkar mi pawimawh tak takte nen an inkawm bakah India mi chengte a hmu ang.

President Mohammed Quid Ghazouani nen India leh Mauritania inkara thil pawimawhte an sawidun ang a. Minister te nen thil pawimawh hrang hrang an sawiho hnuah waviin tlai hian Malawi panin a chhuak leh nghal dawn a ni.

(Newsonair)



## **HARYANA CM**

Haryana-a Chief Minister thar atan Nayab Singh Saini chu vawiinah lakluh a ni dawn. Nimin khan BJP hruaitu Nayab Singh Saini hi BJP Legislature Party leader atan thlan a ni a. Union Home Minister leh BJP hruaitu Amit Shah chuan Legislature Party thlan anih thu hi Panckula-a an party office ah a puang a. Memberten lungual takin Nayab Singh Saini hi an hruaitu atan an thlang a ni a ti.

Haryana Assembly inthlan neih zawh takah khan BJP chuan chakna changin a term thum nan sawrkar an siam leh dawn a ni.

(Newsonair)



## **NIGERIA FUEL TANKER MISHAP**

Nigeria-ah nizan hmasaa tuialhthei phur puakah mi 94 aia tlem lo an thi a, mi 50 chuangin hliam an tuar. Vanduaina thlenna hmun hi Jigawa state hmarlamah niin tuialhthei put va dawh tumin mi tam tak an pungkawm a. Hemi hnu hian lirthei hi puakin kangmei a chhuak chhonzawm ta niin tualchhung media te chuan an sawi.

Lithei khalhtu hi police te chuan man nghalin vanduaina thlen dan hi an chhui zui nghal a ni.

(Newsonair)

